



SAOPĆENJE ZA JAVNOST

14. avgust 2024.

Potvrđena optužnica za razbojništvo Uz prijetnju nožem oduzeo automobil

Tužilaštvo Brčko distrikta BiH podiglo je optužnicu protiv B. M. (47)* zbog sumnje da je prošlog mjeseca u brčanskom nasilju Ilička, u neuračunljivom stanju, vršio teška protivpravna imovinska djela. Pred Osnovnim sudom, koji je potvrdio optužnicu, on je opužen da je u tom naselju nasilnim ulaskom u tuđi stan najprije pokušao tešku krađu, a zatim i razbojništvo nad ženom A. P, kojoj je u ulici Mihajla Pupina zaustavio i uz prijetnju nožem oduzeo automobil.

Optužnicom od 6. avgusta optuženom B. M. stavljeno je na teret da je 9. jula, oko 14:00 sati, u namjeri pribavljanja protivpravne imovinske koristi, došao do stana vlasnika Ž. E. na Ilički, gdje je potiskivanjem ulaznih vrata ušao u unutrašnjost, odakle nije ništa oduzeo. Izašavši iz stana, u kojem je nakon provaljivanja ostavio vlastitu torbicu s većom količinom novca i ključevima od automobila, on je dva sata kasnije u ulici Mihajla Pupina zaustavio vozilo „VW“ Touran, kojim je upravljala A. P. Sumnja se da je potom na njen vrat prislonio kuhinjski nož dužine sječiva oko 20 cm, zahtijevajući da izađe iz auta, nakon čega je ponovivši naredbu nož spustio na lijevu stranu tijela oštećene, a zatim i na njen stomak. Uplašena za svoj i život njene djevojčice, koja se s njom nalazila u automobilu, A. P. je napustila vozilo pokušavajući da pobjegne s djetetom u rukama, dok se B. M. oduzetim vozilom brzo udaljio.

Oduzeto vozilo „VW“ Touran pronađeno je na lokalnom putu u prigradskom naselju Gredice i ubrzo je vraćeno vlasnici. Usto, novac, čiji je pronalazak u stanu na Ilički Policiji prijavio upravo vlasnik tog stana Ž. E, vraćen je porodici osumnjičenog, budući da je utvrđeno da je stečen zakonito.

U intenzivnoj saradnji s Policijom Brčko distrikta BiH, protivpravna djela brzo su rasvijetljena, uz sve važne okolnosti, a počinitelj lociran i lišen slobode, u obližnjem naselju Stanovi. Po okončanju brze i efikasne istrage, za manje od mjesec dana, Tužilaštvo je optužilo B. M. za protivpravna djela, i to za pokušaj teške krađe (iz člana 281 stav (1) Krivičnog zakona Brčko distrikta BiH) i teži oblik razbojništva (iz člana 283 stav 2 Krivičnog zakona). On je optužen da je u neuračunljivom stanju, izazvanom hroničnom neurološkom bolešću, pokušao oduzeti tuđu pokretninu iz zatvorenih prostorija, te da je počinio razbojništvo upotrebom sile i prijetnjom da će direktno napasti na život i tijelo oštećene. Pošto je optužnica potvrđena, postupak u ovom slučaju bit će nastavljen pred Osnovnim sudom.

*Preduzimanje radnji krivičnog gonjenja prema optuženom ne znači da je ta osoba zaista i počinitelj protivpravno djela.